



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

f Tir Yimym

ig tiryimym@aolima

yt tir yimym

TAPAK 7

Party telung nung
mangatetep mali: Rahul Gandhi

UN Security Council nung Gaza
rara anena atatsü pangzüng renem



VOL. XXI NO. 40 (ADOK 40) DIMAPUR ROGONÜ (FRIDAY)

YIMPOKSÜI (NOVEMBER) 17, 2023

₹ 5.00

KPC, DPC aser MPC ajanga National Press Day amung



Cafe Leon, Hill View Colony, Dimapur nung November 16, 2023 nü National Press Day amung dang tangokba noksa ka nung Dimapur Press Club züngsemtem, tongti o jembir Sashiwapang, IRS, Additional Commissioner, CGST Dimapur, K Temjen Jamir, Yimozülur, Tir Yimym aser kaketshirtem angur.

Kohima, Yimpoksüi/Nov. 16

(TYO): Artificial Intelligence (AI) ya tembar mesüra tsükchir asütsü asünunga asenok meimchir tangzüksü jenti lir aser technology tajunglen mesüra tamajunglen amshitsü asenok dak dang keta lir, ta Nagaland Page osangkaket zülur aser kibur, Monalisa Changkija-i ashi.

Brehostibarnü Kohima Press Club (KPC) ajanga APO Conference Hall, Kohima nung "Media in the era of Artificial Intelligence" omen nung ajemdaker National Press Day amungba sentong nung tongti o jembir ka ama jembidang, technology tajung asoshi amshitsü mesüra tamajung asoshi amshitsü human value-system aser meimchir tangatetba dak keta

lir, ta lai ashi.

AI indang osang tali-tali angazüker aser AI ya tembar mesüra tsükchir ama amshitsü asoshi osangbener daka tuluka lir, ta ashi.

Loktiliba aser takum libaluru ajunga nung media ya tongtipang lir, anungji AI tajungba nung amshitsü ya yangji lir.

Osangbener temi nüburtem aser sorkar indang nükjidong, agenda kanga junga shisadangsüla. Alima nung 'date privacy, algorithm bias aser AI technology tem tim masüba nung amshitsü lenmang aliba ngua alima nung AI indang khuret lemsateper aser süoki ia bilemer, ta lai ashi.

AI nung bilemdanga langka kar adokdaksüba aser kati ka

bilemba angatetba aser lemsatepba mali, anungji ideas tasen adoktsü mesüra 'emotions' angatetsü tashi ajemdaktsür, koba media asoshi tebilemsü tulu, kechiaser asenok mapa ya 'creativity, empathy aser originality' nung amendaka lir, ta lai ashi.

Technology renlokba ama AI ya renloka aotsü aser healthcare, banking aser transportation densema sector aika asendenshitsu ta takzüteta lir, anungji asenok media koloni aotsü aser kong aintsü mesüra AI nem anishidaktsütsü asü, ta lai asündanga liasü.

Technology ajanga nisung meimchir nübu menügdakba akumer, anungji mapa mangur tali akumer, sobaliba zünger mezümgai samar aser nisung temolungjang, tekolok aser teka yangluteter, ta lai ashi.

Technology ajunga den tatem nungbo AI ya amshitsü asoshia jenjang talangba akumtsü, anungji democratic yimya, sobaliba aser yimsüyimpong wazüka ayutsüba tangatetba nung inyakba media-i taa agitsü, ta Changkija-i ashi.

AI ya tsükchir ama amshira

media tatem kati arutsüsa timtem ajurutsü aser tembar ama amshira AI ajanga media tajungba kumdaktsütsü saka asenoki azüka amshitsüla, ta lai ashi.

"Technology nung nisung kibur asütsüla aser yangji media ajanga tongti shilem agia AI putu nung meimchir tiyong nung yutsütsüla," ta laisa ashi.

Iba sentong nung Morung Express nungi Moalemba Jamir nem KPC tir Alice Yhoshü-i KPC Impact Journalism Award 2023 agüja liasü.

CEO, Nagaland Building and Other Construction Workers Welfare Board, T. Chubayanger-i osangbener pezü - Reyivolu Rhakho & Thejoto Nienu (Eastern Mirror), Imti Lonchar (Morung Express) aser Kaisa Mao, Photojournalist - nem KPC-NBOCWWB fellowship certificate agüja liasü.

2021 küm nungi KPC aser NBOCWWB lungjemer construction workers temi timtem ajuruba indang osang tejungba bendener.

Iba sentong nung menden KPC general secretary Vishü Rita Kroch liasü, aser Medolenuo Ambrocia Loucü-i sentong tenzüka sarasadem, aser KPC advisor Kopelo Krome ajanga melepzüng o jembia liasü. Iba sentong nung Patkai Christian College aser Kohima College Kohima nungia kaketshirtem arua dena liasü.

Dimapur Press Club (DPC) ajanga linük ajunga den külemi National Press Day nungtem nung sentong ka Café Leon, Hill View Colony, Dimapur nung Brehostibarnü ayongzük, kong tongti o jembir ama Sashiwapang, IRS, Additional Commissioner, CGST, Dimapur

dena liasü.

Iba sentong nung DPC züngsemte, media house balala nungi osangbener, kaketshir aser dangartem dena liasü.

Iba sentong nung jembidang, social media aser algorithms ajanga osang yimya melenshiogo, ta Sashiwapang-i ashi.

Anogoshi takum libaluru nung social media-i tongti shilem agiba indang pai rateta ashi aser yimten yimsüsürtem X (taoba mapang Twitter ta jaa aliba) sapang nung teyakyak asütsü kanga tongtipang kumogo, ta ashi.

Osang prokshitsü asoshi media house shia Instagram account alitsü nüngdaker, kechiaser osang prokshiba yimya melenshiogo, ta pai ashi.

Ajisüaka akhi mapang nungi amshia aruba media outlets temi amabo mesüi osangtsüsang tem mejangjai social media nung prokshir, ta pai ashi.

AI ya anatsü nok ama lir, saka AI ya anogoshi mapa balala inyaktsü asoshi asenoki agizüktsüla, ta Sashiwapang-i ashi.

Media house temi ochishia osang prokshiba/abenba atema pai tenüngsang agüja liasü.

State nung rongsenketzüng aser taxation indang jembidang, Nagaland nung revenue shilem 12 dang adokdaksür aser tanüngba shilem 88 asoshi central sorkar dak metaloka lir. Anungji yamaji metaloka aliba ajanga inyakyim balala nung state-i mera tajung magiteter, ta pai ashi.

Centre nungi union minister tem aser bureaucrats temi maneni tesem tezülen densema state semdangba ajanga senotsü anguba state sorkari amshitsü temesüba akumer, ta ashi.

(Maneni tapak 2 nung...)

Assam cabinet-i SEBA aser AHSEC lokteptsü lemtet

Guwahati, Yimpoksüi/Nov. 16 (Agencies): National Education Policy (NEP) 2020 den lirumedemtsü mechi

Brehostibarnü Assam cabinet ajanga tang aliba board ana - Board of Secondary Education Assam (SEBA) aser Assam Higher Secondary Education Council (AHSEC) - lokteper board tasen - Assam State School Education Board (ASSEB) tentetsü temelaba agütsüogo.

SEBA ya 1962 nung tentet aser AHSEC ya 1984 nung tentet. SEBA nung Class IX aser X lir aser AHSEC kübok Class XI aser XII lir.

Saka tang nungibo ASSEB kübok classes IX, X, XI aser XII alitsü.

"School education indang jenjang yanglutsü, mapa kuma inyaktsü aser achayangtsü mechi SEBA aser AHSEC lungjemer ASSEB tentetsü," ta Tourism Minister Jayanta Mallabaruah-i cabinet senden sülen osangbener dang ashi.

Vocational subject tem nung subject teachers densema graduate aser postgraduate teachers shimtsü asoshi cabinet

ajanga Assam Secondary School (Government Schools) Service (2nd amendment) rules 2023 aser the Assam Secondary Education (Provincialised Schools) Service (2nd Amendment) rules, 2023 agizüka liasü.

Tang agizüka aliba ozüng kübok kaketshir aser tesayur ratio junga ayutsü, provincialized aser government school tem nung secondary level nung academic inyakyim nung timtem majurutsü aser kaketshir nem academic teyari tajungba agütsütsü asoshi nübu tajungtem amshitsü nükjidong lir.

Barak Valley aser Dima Hasao atema Khasi-Jaintia Development Council tenzüksü asoshi cabinet-i 'ex-post facto approval' agütsüogo.

Ano Mission Basundhara 2.0 kübok Morigaon, Kamrup (Metro), Kamrup, Goalpara, Lakhimpur, Sonitpur, Darrang, Tinsukia aser Dhemaji district tem nung ali makar kibong 3,576 nem ali agütsütsü benokba cabinet-i agizük.

Maneni cabinet-i budget session ya February 5, 2024 nungi amentsü lemtet.

Manipur nung osangbener asoshi sorkari sen lakh 29 agütsü

Imphal, Yimpoksüi/Nov. 16 (Agencies): Manipur nung media house balala nung inyaker osangbener yaritsü asoshi Manipur sorkari sen lakh 29 agütsü.

Brehostibarnü Imphal nung National Press Day amung dang iba osang ya Director, Directorate of Information and Public Relations, Dr. Th Charanjeet Singh-i sangoktsü.

Manipur State Journalists Pension Scheme kübok osangbener mapa nungi anisüngzüka alir nisung 26 nem ita shia pension sen 8,000 agütsü.

Manipur Working Journalist's Pension Rules, 1996 ajanga osangbener tejen nem

one-time pension payment sen 10,000 agütsü.

"Media in the era of Artificial Intelligence" omen nung ajemdaker Imphal nung DIPR Complex nung aliba Auditorium nung National Press Day nungtem nung workshop ka ayongzüka liasü.

Democratic society nung tenokdangba makai ochi nung osang abenba benjonga aser 1966 küm Press Council of India tentetba temaitsü küm shia November 16 nü iba anogomung amunger.

Press Council of India ajanga shilem tajung agiba tushitsü nükjidong nung iba anogomung ya amunger.

Iba sentong nung shisalen sayur ya Dr. Khumukcham Robindro Singh, Assistant Professor, Department of Computer Science, Manipur University, aser Thongam Bobo, Sr. Technical Officer, NIELIT, Imphal liasü aser Yumnam Rupachandra, Editor-in-Chief, Impact TV News ya onir liasü.

Workshop nung shilem ka ama sensaksemba mapanga liasü. Iba workshop nung media firms balala nungi yimo zülurtem, senior journalist, Department of Mass Communication and Computer Science, Manipur University aser NIELIT nungi kaketshir temi shilem agia liasü.

Additional Secretary Hiazu Meru-i GHSS Jalukie semdang



Additional Secretary School Education, Government of Nagaland Hiazu Meru den GHSS Jalukie school ketdangsürtem tangokba noksa nung angur.

Dimapur, Yimpoksüi/ November 16 (TYO): Additional Secretary School education Government of Nagaland, Hiazu Meru NCS-i November 16 nü Government Higher Secondary School Jalukie semdanga liasü.

Secretary den sensaksema mapang Government Higher Secondary School Jalukie Principal Asenla Pongen-i, küm aika tesayurtem aser staff tem agi anüngba ajanga school anep

anepa inyaksangshi mesüteti tetsükdaksü adokba indang metetdakja liasü.

Principal-isa, Nagaland sorkar dang aser talisa Additional Secretary shibai school semdanga liasü, pa dang item tebilemstütem ya süoki ia agitsü atema mepeshia metetdaksüogo.

Kasa mapang nung Additional Secretary School Education, Government of Nagaland Hiazu Meru-isa,

school balala semdang aoba mapang parnoki lemsatepba khuret tem GHSS Jaluki dena lemsatepa liasü.

Hiazu Meru-i, school-i lemsatepba khurettem bentettsüsü asoshi takokba tashi inyaksü tenangzükba agütsü. Staff aser SDMC züngsemtem den senden tembangba sülen ano class 10 aser 12 nung azünger kaketshirtem den sensaksema mapang ka agia liasü.

Mokokchung DPDB senden menogo

Dimapur, Yimpoksüi/ November 16 (TYO): Ita shia amenba Mokokchung District Planning and development Board (DBDP) senden November ita atema November 16 nü Deputy Commissioner Conference Hall nung menogo.

Iba senden ya Mokokchung DBDP mendenbuba aser advisor water resources Government of Nagaland, Tongpang Ozukum lenisüba nung mena liasü.

Senden nung DBDP züngsemtem tenüng nung mendenbubai Tir Yimiyim Publications Proprietor K. Temjen Jamir-i, Tir Yimiyim osang kaket tenzüker küm 20 ajungba tenüng nung Mokokchung Vision 2040

Documentation Booklets copy 500 tenla agütsüba atema pa dang kanga pelaba lemsatepa liasü.

Senden nung onüktem benoka sensak asema mapang ITI Mokokchung Principal-i, District Skill Committee-i achaayangba Job Mela indang osang tatsüka agütsü, koba 2024 küm January ita agitsü lir. Senden nungsa NPSC aser NSSB candidate tem atema coaching class agüja aliba dak sendakba nung Management committee züngsemtemi osang agüja liasü. Maneni E.EPWD (NH) aser District Fishery Officer-i department inyakyim indang Power Point Presentation agüja liasü.

Senden nungsa Board-i, 'Mokokchung Lotha HoHo' züngoksemsü atema agizüka tejakdangi benogo aser Government Primary School Moalenden, Middle School jenjangi ajungkettsü atema agizüka liasü.

Kasa mapang nung ADC Mokokchung Chumlamo Humtsoe-i, November 23 nungi 25 tashi asayatsü aliba Mokokchung District Inter-Departmental sports meet indang metetdakja liasü.

Mendenbubaisa, Urban Development aser PWD (R&B) department dang taruba senden nung department inyakyim indang power point presentation agütsüsü metetdakja liasü.

Kohima ADC-i metetdaksür

Dimapur, Yimpoksüi/ November 16 (TYO): Additional Deputy Commissioner aser Electoral Registration Officer Kohima, Rhosietho Nguori-i sangdong ka ajanga, tang agia aliba Special Summary Revision of Photo Electoral Roll dak sendakba nung Kohima District kübok temsüa aliba lisopur shirnoksa

tenüng mezüngoksemi ali parnok atema polling station ajak nung November 17 aser 18 nü 2buba Special Camp ayongzüka agitsü ta metetdaksüogo.

Shisema aliba anogo temsü alirtem ajak pei tata polling station tem nung tenüng züngoksemsü atema ADC-isa mepeshia metetdaksüogo.

Social worker Kiran Verma Dimapur tonga aruogo



Dimapur, Yimpoksüi/ November 16 (TYO): Delhi nung amendaker aliba social worker Kiran Verma, shiba India nung azü tenlaba dak sendakba nung tangazükba agüja km 21,000 jajtsü asoshi 2021 küm December 28 nü Thiruvananthapuram nungi apusoa liasü, pa Brehostibarnü Dimapur tongogo.

Pa district 219 ayimjema km 17,400 dak tema jajaba sülen Dimapur tongogo.

Kiran Verma ya Delhi nung amendaker aliba social worker ka lir, pai Simply Blood aser Change With One Meal ta sentong ana kübok "Change With One Foundation" tenzüka liasü.

2018 küm Kiran Verma-i, km 16,000 ayimjema India kübok tesem balala semdang aser iba

mapang pai kasa nükjidong asoshi km 6,000 tetsüing agi jaja liasü.

Azü dak sendakba nung tangazükba agüja pai tetsüing agi jajaba ya alima nung nisung kati tetsüing agi jaja-a blood awareness campaign ayongzüka agiba talangtiba asütsü, koba küm 2 dak tema agitsü.

Iba sentong ayongzüka agiba nükjidongji nüburtem nem azü tenla dak sendakba nung tangazükba agütsüsü asoshi lir, ajita asünungdang 2025 küm December 31 nü sülen nungibo India nung azü ataba mapa shinga masütsü. Dimapur semdangba sülen pa Nagaland nung tanungba tesemtem, Manipur, Mizoram, Tripura aser North East India nung tanungba tesem ajak semdangtsü.

KPC, DPC aser MPC ajanga National Press Day amung

(Tapak 1 nungi...)



MOKOKCHUNG PRESS CLUB



KOHIMA PRESS CLUB

Nagaland nung entrepreneurship ajungkettsü nüngdakba indang jembidang, state nung industrialisation indang jembia aodang 'land ownership' nung tsükdaker, ta pai ashi.

Totzü bushia atsüba maliba ajanga Nagaland küm shia royalties sen crore 1,800 akoksar, ta ashi.

Nüburtemi ali rongsen mamshira sama aotsü, kechiaser alima 'green energy' tsütsüi aor, ta pai ashi.

Iba sentong nung menden DPC executive member, Paudi Renta liasü, DPC tir Imkong Walling-i pela agizükba o jembia aser DPC vice president,

Honikali Lohe ajanga melepzüng o jembia liasü.

Iba sentong nung Tir Yimiyim yimozülur K Temjen Jamir-ia jembia liasü.

India linük ajunga den külemi Mokokchung nunga tanü Mokokchung Press Club-i ayongzüka National Press Day nüngtem nung 'Media in the Era of Artificial Intelligence' omen nung ajemdaker sentong ka Whispering Winds Hotel nung kaogo.

Iba sentong nung Principal of ITI Mokokchung, Er T.Imlisunep Ao-i omen dak ajemdaker tongti o jembidang Artificial Intelligence ya media asoshi kanga dang tongtipang

oset ka ama lir, anungji Mokokchung nung osang zülurtemi iba Artificial Intelligence tashiji amshia nüburtem nem osang lemsatepangta Mokokchung nung osang zülurtem ajungshi.

Tongti o jembirisa Mokokchung district-ji mapa junga inyaktetba molutetdak tesem ka sütettsüla tangazükdak akatsü nungtaker. Mokokchung nung tanga district nüburtemi Mokokchung nung mapa ayanga chiyunga litettsüsa mapa aser lenmang sadema nguteter jokola asen lima parnok talisa tanga district nungi aruagi lidagi. Parnok nemji mapa temsüa

inyaktettsüsa asenoki lenmang sadema laopktsütsülata ashi.

Mokokchung nung osang zülurtemi nüburtemi tamang katettsüsa mapa jenti inyaktetgo, ano maneni nübur tenzüka wadang talisa osang agütsüba nung ochi osang aguja maneni nübur tejakleni anitsü tamang akar ta Er T.Imlisunep Ao-isa Mokokchung nung osang zülurtem ayongz ka jembia.


Sentong nung Mokokchung Press Club Tir Wb.Limalenden Longkumer-i tarur pela agizükba den sentong agiba nüngtem telok den lemsatep aser Mokokchung District Public Relation Officer

Wb.Tialemba Ao-i tayongzükba o jembia iba den

Dr.Limasenla Jamir shiba osang zülur ka liasü aser tang Fazl Ali College nung Assistant Professor inyaker laila osang zülur ka ama inyaka arudang ajangshibatem lemsatep aser Mokokchung Press Club Tongti Zülur Wb.Sashimeren Jamir-i tepela o jembiba den Kr.Temjennaro Longchar ketdangsüba nung iba sentong agi.

Tanü iba sentong nung Aoli Watsü Mungdang, Ao Kaketshir Mungdang, Mokokchung Town Lanur Telongjem aser All Ward Union Mokokchung nungi lenirtem aruagi dena liasü.

BJP-i Rajasthan assembly election atema party manifesto saya



November 16, 2023 nü Jaipur nung BJP National Tir, J.P. Nadda, taoba mapang Rajasthan chief minister Vasundhara Raje aser Union Ministers- Arjun Ram Meghwal aser Gajendra Singh Shekhawat nungeri Rajathan Assembly elections atema BJP manifesto sayatsüdüng tangokba noksa nung angur.

New Delhi, Yimpoksüüi/ November 16 (Agencies): Brihostibarnü BJP National Tir, JP Nadda-i Rajasthan assembly elections atema party manifesto sayaogo.

Manifesto nungji tetsürtem, aluyimertem aser sensakertem taküm jenjang ajungkettsütsü atema tenangzükbatem densema lir.

Manifesto sayaba sentong nungji jembidang Nadda-i, "Iba manifesto ya onok atemabo inyakyim ka dang masü saka terenlok atema asalentongtem lir. Onoki jembiba ama inyaker,

onoki nangzükba ama inyaksü," ta metetdaksü.

BJP manifesto nung tongti tenangzükbatem rongnung: Ujjawala beneficiaries atema LPG cylinder nung sen 450 subsidy, wheat quintal ka shia MSP sen 2,700, jalatem atema savings bond sen lakh 2, district shia ajak nung 'Mahila thana' aser police station shia nung 'mahila desk' amenoktsü aser yimti shia nung Anti Romeo Squad nangzuka lir.

Rajasthan nung Congress sorkar aija Nadda-i, Congress-i ochimashi inyaker, tejak

repranga inyaker aser özüng alema inyakba tensa mazüokteter, ta aitsü.

Rajasthan nung Ashok Gehlot-i aniba sorkar ya Congress-i ochimashi aser tejak repranga inyakba tatishitsü lir, ta pai metetdaksü.

J P Nadda-isa, BJP-i state nung tetsürtem nem tashi agütsütsü atema 'Lado Incentive Scheme' tenzüksü aser iba scheme kübok kinü tetsür chanu atema saving bond sen lakh anana agütsütsü, ta metetdaksü.

Uttarakhand nung aayangertem kümzüksü atema anogo 2-3 agitsü

Uttarkashi, November 16 (Agencies): November 12, 2023 nü Uttarakhand state kübok Uttarkashi nung tang teyangludak 'tunnel' ka chirepba lendong nung yangji mapa inyaker nisung 40 shi nembang aser tang tashi parnok shinga mekümzük.

Brihostibarnü Union Minister of State of Road Transport & Highways, VK Singh-i iba tesemji semdanga kümzükba maparen osang metetpela.

Iba tesem semdangba sülen osangbenertem den jembidang Union Minister Singh-i, aayanger nisung 40 kümzüksü atema ano anogo 2-3 shi agitsü, ta metetdaksü.

Singh-isa, tekeraba nung aayangertemji kümzüksü atema sorkar, agency balala aser international mongintemi meranga

inyakdar, ta metetdaksü.

"Aayangertemji tasü itta lir, aser parnok kümzüksü atema akokba tashi meranga inyakdar, ta parnoki angateta dang lir," ta paisa metetdaksü.

"Parnok tekeraba nung kümzüksüji onok atema tongtibangtiba mapa lir. Iba atemaji meranga inyakdar. Ano gol tasen ka amshia inyakdar. Onoki taruba anogo ana-asep tsüdüngda kümzükba maparen ya tembangtsü atema meranger. Onoki international mongintem teyaria agidar. Sorkari parnok kümzüksü atema inyakdar, ta parnoki meteta dang lir," ta pai metetdaksü.

Parnok kümzüksü atema 'American auger' machine amshidar. Iba machine yagi ali perü-a aiba sülen aayangertemji kümzüksü.

Colonel Deepak Patil leniba nung National Highways & Infrastructure Development Corporation Limited (NHIDCL)-i, 'American auger' machine jagi ghonda tesadang nung metre asem kera ali perü-a air, ta metetdaksü.

Colonel Patil-isa, parnoki New Austrian Tunnelling Method (NATM)-a amshidar; iba gol yagi ali perü-a aiba sülen poksatsür, ta metetdaksü.

Taoba Amongnü anepdang Uttarkashi district nung Silkyara aser Dandalgaon tsüdüngda Brahmakhal-Yamunotri National Highway nung tang teyangludak ongken (tunnel) ji tesem ka chirepa liasü, iba mapang nungjagi tenzuka NDRF, SDRF aser Uttarakhand Police senteper parnok kümzüksü merangdar.



Bhopal, November 16, 2023: Madhya Pradesh nung assembly election agitsü anogo ka jelia Polling ketdangsertemi EVMs aser election materials bener poll duty atema apusoba mapang tangokba noksa nung angur.

Party telung nung mangatetep mali: Rahul Gandhi

Jaipur, November 16 (Agencies): Rajasthan Congress party telung nung lenirtem tsüdüngda mangatetep adoka lir, ta olulu jembiba mapang Brihostibarnü Congress lenir, Rahul Gandhi-i, party nung lenirtem ajak longjema dang lir, ta metetdaksü.

Rajasthan Chief Minister, Ashok Gehlot aser party lenir, Sachin Pilot naprongla lia Rahul Gandhi-i, party longjema lir aser state assembly election nung party-i takok angutsü, ta ashi.

Jaipur nung osangbenertem den jembidang Rahul Gandhi-i, "Onok külemi nokdaka anguba ya dang masü saka onok longjema-a lir. Onok longjema dang alitsü aser yangi Congress-i takok angutsü," ta metetdaksü.

Osangkakettem nung state nung party lenirtem tsüdüngda mangatetep adoka lir ta jembiba mapang ka nung Rahul Gandhi-i iba osang ya jangjashitsür.

Rajasthan kübok Churu nunga election nüboyim 25 sentong ka nung jembidang Rahul-i, nüburtem coronavirus

tashidak agi asüba mapang nung Ato kilonseri nüburtem dang auso temshitsü tuyua liasü, ta ashi.

"Narendra Modi-i, 'ochimashi sen mesamadaksütetra ni alenseta sädakjang' ta ashi. Corona mapang nung Narendra Modi-i nenok dang- mobile phone torch tsüklokang aser auso temshiang ta ashi. Linük tesem ajaklen nüburtem asü, oxygen mesüra mozü maliasü, iba mapang nungji Narendra Modi-i, auso temshiang ta ashi," ta Rahul-i metetdaksü.

"Ano külenbo Bhilwara model liasü. Rajasthan nunga auso temshi saka yangibo kibok shia chiyungtsü lema agütsü, mozü lemsü aser shirangertem kümzük. Kechiba? kechiyong onoki sensakertem, aluyimertem aser aayangertem atema inyaker," ta Rahul-isa metetdaksü.

Brihostibarnüsa Nohar nunga Rahul Gandhi-i election nüboyim sentong ka nung jembia liasü.

Assembly menden 200 aliba Rajasthan nung November 25 nü election agitsü aser December 3 nü vote azüngtsü.

Clarification on SARB Possession Notice dated 16.11.23

Whereas, it has come to the knowledge of the undersigned that the Stresses Assets Recovery Branch, Jorhat has fallaciously published a possession notice against me and my guarantor in the local dailies on 16.11.2023 tarnishing our good image and reputation. As such, it is factually clarified as under.

That I have availed a loan from the State Bank of India, Dimapur Branch for a start-up business under the name M/s. Juniors Hub, Zakiesato colony, Dimapur, Nagaland.

That it is an admitted fact that I had outstanding loan dues with the State bank of India, Dimapur Branch. However, the claim made in the said notice, wherein it is claimed that no payment has been made since 01.06.2023 is factually incorrect. and on top of that During the month of September and October 2023, I have paid an amount of Rs. 20,14,000/- out of the total amount of Rs. 49,18,239.44 in three installments i.e. Rs. 6,00,000/- on 16.08.2023, Rs.9,00,000/- on 08.09.2023 and Rs. 5,14,000/- on 07.10.2023. In addition to these major payments, the Bank has been deducting regularly from the pension salary of myself and my husband which is in excess of Rs. 1.00 lakh monthly. More importantly, on 15.11.2023, we were approached telephonically by the official of SERB SBI, Jorhat Branch asking for updates on the payment. In course of this discussion, we had assured the officer concerned that we would liquidate the entire outstanding dues on or before 25.11.2023 and the officer concerned agreed to the same and emphasized on the need to meet the assured deadline without fail. However, to my utter surprise, within a span of 24 hours, the said notice was issued against me. Considering the fact that we have made payments in excess of Rs. 20.00 lakh within a span of two months and as recently as October 2023, it is amply clear that there has been genuine effort on our part to clear the dues at the earliest. Given these circumstances, the said SARB Possession Notice is totally unwarranted and ill motivated, laced with vendetta.

And hence, for the general information, the said Stresses Assets Recovery Branch, Jorhat

Possession Notice, has been considered as illegal, ill-informed and ill-motivated and as such, legal options are being considered against the said Bank for the ends of justice.

Sd/-
Smt. Mereninla,
Proprietor of M/s. Juniors Hub,
Zakieseto colony, Dimapur, Nagaland.



TIR YIMYIM YIMOBILEM (EDITORIAL)

DIMAPUR ROGONÜ, YIMPOKSÜI (YIMPOKSÜI) 17, 2023

Mapai maruba tebilemstsü

Mapai marurbo ita sen mangutsü ta government nung tongti ketdangsertemi parnok kübok government tenzükertem dang ashiba aiben angashir. Shitakba nungbo ibaji ashitsü nungdak madoker, kechiyong mapa inyakba atema ita sen agütsür, anungji mapai marura ita sen agütsüsbaji nungdak madoker. Ibajibo mapai aidangyongi metetdaksütsüla aser department shia nung tokolakbai itemji züngzünga reprangtsüla. Ajisüaka, iba ama mapaji jembitsübo temela saka mapa kuma inyaktsübo tasak, kechiyong department nung mapai junga marurtem rongnung tongti ketdangser dena lira, shibai shiba mapai maruba indang reprangtsü. Aji oda, office shia nung inyakerkem anogo shia mapang shitak nung mapai arutsüba atemaji ozüng masü saka tokolakbai mapa agi sayutsüla. District aser sub-division-tem nung aliba office tiaji khen yutsür, Kohima nung state nung tulutiba Chief minister aser Chief Secretary amendak Nagaland Civil Secretariat nung inyakerkem dena mapai junga maruba indang yakanü department shia nungi tokolak purtem den senden alidang Chief Secretary-i metetdaksüba jagi Nagaland tanela sayur. Civil Secretariat ya department shia nung nübertem asoshi telemtetba agidak lir, anungji nübertem asoshi yangji inyakerkem ajurutsüsbaji kanga nungdak akümer. Ajisüaka, len talang nungi arur office nung nisung majurubaji kanga tezüdangtsüka, iba timtem takoksaji tajangshir aser tajurtemiang dang metet. Atangji, Nagaland nung mapa dang nungibo nisung teimba shima lir, kechiyong asenokbo mapa inyaktsü atema government mapa bushir masü saka ita sen chia alitsü atema bushir. Iba jagi government mapa ngur mapai mao ita sen achitsü bilemer. Iba denji asen lima nung government mapa inyakerkem aika nübertem nungdak inyaktsütsü asoshi masü saka pei ajangzüksü asoshi dang bilema inyaker, iba jagi pei tajangzük angutsü aliba mapa inyakdangbo teti office-i aotsü saka tangar nungdak inyaktsüba anogotem nungbo office-i maotsü ta nübertem timtemdaksüba otsü aika lir. Iba kasa tia nung district aser sub-division-tem nung akaba officetem odagi. Atangji, department karbo office-i aoyonga mapa maka, kechiyong government-i nübertem asoshi nungdak inyaktsü senotsü magütsütetba dang masü tamentsü mendena magütsüteter aser kiojen yanglushitsü makoker. Iba ama tensa ka nung, state government-i mapai marurtembo yutsür, mapai arurtem nema ita sen mapang shitak nung magütsüteti kümdagi. Item tensa tia ajak ya khen jungjunga reprangshir government mapa inyakerkem rongnung department shia nung nungdakba inyakerkem shimteta yurbo, tangar menüngdakba purtemjibo parnok tangutsü tim agütsür sodi agütsüang shitak asütsü. Government mapai irr mapai mao ita sen agibaji government dang masü saka tagirtem asoshia majung, kechiyong mapai mao ita sen angati agibaji tajung amai saka iba jagi peisasa pei taküm külakoktsür aser azükaru masü taküm rajang akümer. Alima nung nisung ya mapa inyaka alitsü atema yanglu, anungji mapa inyaktsüla aser pei mapa yari tajangzük angutsüla. Iba tangatetba nung, government nung alirtemi pei mapang, government mapa nung teinyaktsübo mali ser nung pei nisung mapai idaktsütsü memerangi parnok inyaktsüba mapatemang adokdaksütsüsa tangalen nungi dena shisa tasen bener arua inyaktsüla. Tang tashibo Nagaland ya government ita sen achiba state-ang ka kümdakja lir, aji agi tang asenok timatemer. Office-i aoyonga mapa mali aser mapa aliyonga teinyak mashi, anungji Nagaland nung government office aika sorak aser koya agi anüker aser ita sen-ang nisungi achir. Joko, Nagaland nunga government office mapatem yabo nisung ishikati züngzünga inyaktsüla aser tanüngba nübertemi chiyongtsü züsenba aser ali rongsen züindaktsüba maparen balala tenzuka inyaktsüla. Idangjibo, office nung inyakerkema mapai ajatsü aser office nung meinyakerkema chiyongtsüa mapang mangu peii tenzükba wadang nung nokdaksü. Idangjiang, Nagaland ya ita sen achir lima masü mapa inyaker lima kuma takar akümtsü.

OLEMSABANG

Tesüiba Putu-i Inyaka Yutsüba lemtet tem Meputeper ya metemdanga meyiba Reprangshidangtsü koda

T. Imti Jamir

(Yashi adok nungi...)

1. Dr. Clark record agi yamai ashir: 1892 on Feb 27 There was a meeting with the Missionary at Dekahaimong of the Converts who desired baptism, the teacher was also present after relation of the Christian experience three men were deem worth of Baptism on the Sabbath the 28 th then three men were baptised Viz, Suaka, Tsuknungnokshi and Kimung. On Sabbath evening there was a celebration of the Lord's Supper; at this time also a church was formed at Dekahaimong Village of which the following are the names. Suaka, Tsuknungnokshi, Kimung, Rongsenchiba and his wife Tongpangkoka also Tsuknungtoba, (The three from Yajang). Also from Molung Akangba Imliba, Talikaba, Imnameri and Mayanglemba. These 11 persons constitute the Baptist church of Dekahaimong.
Dr. Clark record agi yamai ashir, "Temulung meyipa amangertem shirnoki tzü nung baptitsü jangra, parnok den missionary dena Dekahaimong nung 1892 kum Feb 27 nü meeting ka kaa liasü. Tesayurjia dena-a liasü. Khristian taküm libalirua aruba reprang nung nisung asem tzü nung baptitsü tetemsü ta ajiteta. Amongnu 28 nü idakji nisung asem baptitsü parnokji, Suaka, Tsuknungnokshi aser Kimung Amongnünungjagi ano Dekahaimong yimdak arogo ka tenzük, tenüngtemji itemi Suaka, Tsuknungnokshi, Kimung, Rongsenchiba aser pa kinungtsü Tongpangkoka, ano Tsuknungtoba (Yajang nungi nisung asem) Ano Molung nungi Akangba, Imliba, Talikaba, Imnameri aser Mangyanglemba, parnok nisung 11 jagi Dekahaimong Arogoji kümtet (Tenzük)
2. Ano Dr. Clark-i Amguri nungi zuluba Baptist Missionary magazine Vol. 73. 1893 nungyamai ashir: "The year closing with December 1892 presents No starting facts. Onenew Church had been formed. It is in the village where the first baptism wereperformed in the Naga hills. It was because the Christians were persecuted so muchin this Dekahaimong village that they were induced to form the new village Molung. 1892 kum tatem December tashi arudang süngmangtsüsa mapa tasen kechabalaka ataloka maru. Arogo tasen ka tenzük, ibaji Naga Hills nung mezüngbuba Baptiba kong liasü iba yimdakji liasü. Dekahaimong yimdak Khristantem onsarashikangshiba yong Molung ta ajaba yim tasen ka akümtsü parnoki mulungtet.
3. Rivenburg tebuttsü Hattie the Star of Naga Hills nung yamai zülü: Extract from "The Star of the Naga Hills" Hattie from Molung 1885 P.54 "our first stop was Dekahaimong where Dr. Clark started the work for the Ao Nagas. It makes me (Hattie) feel very sad to think that there are still no Christians in this beautiful place, inspite of many years in which work here has been done. I have been wondering if we must wait so long before seeing the fruits of our labour"" Onok mezüng anendakji Dekahaimong liasü, kong Dr. Clark-i Ao Naga asoshi mapatenzük. Idakji kum aika endoka mapa inyaka, iba tobur tajung tesem ka nungi tangtashi Khristantem maliba meteta iba yagi ni (Hattie) kanga mepelai kümdaktsür"
4. Ex-Pastor tsurabur Repalemba-i 16-9-80 nung Research Committee dang ashiba:
 - (1) Ni adokdang (1919 nung tamanger liasü, saka member mali asü.
 - (2) Ni adoker mezüng baptirtem, Lanukaba, Yimnügenba, Korajungba, Susula.
5. 1940 Molungyimchen Arogo report, pastor Repalembai 1919 kum nung iba Arogo tenzük. Tamasa Khristan akümba.
 1. Korajungba
 2. Lanukaba
 3. Yimnügenba
 4. Susula

Anungji ABAM ECA-6/7/-72 dated 21-3-72 No13; ABAM ECA-3/72-73 dated Impur, April 4, 1973, No 8 (a) ABAM ECA-1/72-73 dated Impur the 5th 72 ajakji shitak ta kuli adoker.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Takumbo Bethlehem nung Khristmas benjung mamongtsü



Bethlehem nung Yisu Khrista asoba tesem- 'Manger Square' nung raliwalirtem noksa nung angur.

November 16, 2023: Küm shia Bethlehem nung Khristmas kanga longsoa amonger; talisa raliwalir bendangertemi iba yimti semdangba ajanga iba benjung kanga longsoa amonger, ajisüaka tawa rara nung asür Palestine nungertem nem akhüm agüja takumbo iba benjung mamongtsü, ta ketdangsertemi metetdaksü.

Bethlehem ya West Bank kübok lir, aser iba yimti nung takumbo Yisu Khrista asoba tesem 'Manger Square' nung Khristmas süngdong mesüra benjung sübotsü kecha meinoktsü.

Bethlehem Municipality

nung otongdar kati, "Gaza nung taküm bendanga agüja asür ozü nüburtem (Palestine nungertem) nem akhüm agüja benjung mamongtsü," ta metetdaksü.

Ajisüaka Khristmas tekülem sentong aser sarasadembo agitsü, ta parnok metetdaksü.

Bethlehem Municipality otongdarisa, "Kuliji Palestine tensa ajanga lir; nüburtem melungjang nung benjungbentsü tanela mali, parnok jashir aser mepelar; Gaza nung ozü nüburtem tepseter, taochi makai tepseter," ta metetdaksü.

"Anungji Gaza nung nisung jenti tepsetba aser West Bank

amakba mapang nung benjungbentsü amongtsüji tim masü," ta paisa metetdaksü.

Tang Bethlehem nung nütsüng 25,000 shi dang lir, ajisüaka küm shia Khristmas atongtsü mapang nungi tenzüka alima tesem balala nungi raliwalirtemi Bethlehem semdang aser Khristan aikati temeshi aini oa Bethlehem nung Manger Square semdang.

Bethlehem ya Yirusalem nungi mile 6 shi dang pilar West Bank kübok lir.

"Bethlehem-i alima dang mangyimba osang sangoktsütsüla," ta paisa metetdaksü.

Tang mezüng Church of England-i kasa kiyimertem moatsütsü

November 16, 2023: Tang mezüng Church of England-i temeja sentep ayongzüka kasa kiyimertem (tebur o tebur na mesüra tetsür o tetsür na kiyimba) moatsütsü.

Church of England Parliament nung Arogoi kasa kiyimertem moatsütsü atema vote agütsütepa liasü aser vote tali ka agi iba telemtetba agia liasü.

Church of England-i tang tashi kiyimbaji tebur ka aser tetsür ka na tsüngda dang lir, ta tesayuba agütsür, ajisüaka Rt Rev. Steven Croft-i kasa kiyimertem atema sentong katsütsü tamalen benoka liasü.

Kasa kiyimertem kiyimba sentongji Church of England-i agitsüba official kiyimba sentong amabo masütsü, ajisüaka kanga mesükteper asütsü.

Archbishop of Canterbury, Justin Welby aser Archbishop of York, Stephen Cottrell natia 'Arogoi kasa kiyimertem moatsütsü' pusema vote agüja liasü.

Ajisüaka Church of England

nung 'conservative' züngsemtembo aikati iba telemtetba agiba agi mepelar.

Church of England kübok Evangelical Council national director, Rev. Canon John Dunnett-i, iba telemtetba agiba ajanga pa mepelar, ta shiogo. Rev. Canon-i, "Iba telemtetba agiba ajanga Arogotem nung züngsemtem tsüngda telemsa adoktsü, putirtem aser bishops tsüngda tesendaktep raksatsü aser Arogo aika nung züngsemtemi, sannükertemi parnok sendoker ama bilemstü," ta metetdaksü.

Kasa kiyimertem kiyimba sentong ketdangsä agitsütsü atema putir shinga nem-a melemzüksütsü saka putirtemi parnok sasa melungteta item ama kiyimba sentongji katsütsü.

Kasa tetsür o tetsür na mesüra tebur o tebur na kiyimba kulizüng agitsütsü atema Church of England nung putirtem nem temelaba agütsütsü asoshi Parliament nung bill benoktsü atema taküm March ita nung telemtetba agia liasü.

UK nunger ozüng kübok tetsür o tetsür na mesüra tebur o tebur na kiyimba kulizüng agitsütsü atema putirtem nokdang.

Taoba mapang cabinet minister aser tang Labour MP, Ben Bradshaw-i iba atemaji bill ka benoktsü aser bill ji agizükra kasa tetsür o tetsür na mesüra tebur o tebur na kiyimba kulizüng agitsütsü atema Church of England nung temelunger putirtem nem temelaba agütsütsü, ta tamalen metetdakja liasü.

Kasa tetsür o tetsür na mesüra tebur o tebur na kibong kümer alirtem Arogoi moatsütsü atema tesüiba küm trok tashi jembia aruba sülen taküm küm tetenzüklen Church of England General Synod nung vote agütsütepa iba telemtetba agia liasü.

Anglican-ibo, kasa tetsür o tetsür na mesüra tebur o tebur na shi nung medemba mesüra kibong akümba ya Laishiba tesayuba anema lir, ta tangatetba nung maneni nokdaker.

ANOGO ABEN TSÜNGREM DEN

Tasü nungi taküm dangi

2 Timothy 1:10

Kangki nung Khrista mapaji Tsüngrem taochi tiyongtsü lir. Maneni meimchir tekümtet asoshi Tsüngremi Pa taochi talubusa agütsüba kangki jagi sayur.

Asenoki angajemtsü atema tanü azüngba nung taochiji tapu asem lemsar sayur. Ka tesüba nung renemba tanga lir. Ka tang temoatsü maneni alir aser asembubaji tamanger asoshi tenangzükba.

Mezüngbuba, Pai tasüba indok saka iba tetezü, Adami temenen menaba asoshi Tsüngremji temerenshi Khrista kangki ajanga melenshi. Khristai kangki nung tasüba ajuru - ibaji temang asüba, tanelaren asüba aser tanabuba tasüba. Tasüba, tetezü tepila, ibai Khristai Tsüngrem aser nisung ain adokba mapa tamajung nung angur. Tamangertem asoshi tasübaji kodanga amokmerenba ka masütsü. Khristai teti asoshi tasüba madak tamangertem asoshi takok nguogo.

Tanabuba, Tsüngrem alizüngji Khrista asüba nungi tasü nungi taküm adokdaksütsüba. Shia arubaji tamangertem ajak nem Tsüngrem taküm agütsüba kimong lir. Khrista den telungjem akabaji taküm kechiaser Tsüngrem pa den lir. Tanela Temeshi asenok dak aliba jagi asenok Tsüngrem ki kümdaktsür, aser asenok nem tekümtet temoatsü ajak bener arutsür. Tamanger shingai Tsüngrem pa dak malir mesüra pa Tsüngrem nungi pilaa lir ashitsü makok.

Tasembuba temoatsüji asenok masütsü ta nangzük. Iba tetezü asenoki kodanga tasüba majangtsü ta masü saka asenok tasüba nung joko malitsü. Mamangertem tasübai dang aitsü masü saka pa tasüba nungi kodanga matoktsü. Tasübaji Tsüngrem nungi pilaba tamangertem tasüba kiküm ajanga oaka, masütsü. Asenok Tsüngrem shiba taküm lir Pa nungi kodanga pilaa mali.

Itemi asen ano aika sentsüwangshi Tsüngrem osangtajung nungji dena lir. Tsüngrem chir tenüng nung aikati amangdaksütsü asoshi asenoki osangtajung osangji kümdanga agütsüdi.

Oba, kangki nung aser Khrista shia aruba nungi item temoatsütem aser aruba asoshi Ne tenüng asanger.

Gaza nung Muslim nunger aikati Yisu pongmanga Pa agizük

November 16, 2023: Tawa zünga sayur aser Yisu ajanga Gaza Strip nung Muslim nunger dang tesünep anguba tebur aikati pongmang nung lemsateper."

Yisu Khrista anguba sülen Khrista agizükogo; iba ya sayatenya ka lir, ta region nung aliba Khristantemi metetdaksü.

Kaketzülor aser Khristan temeden atema jembir, Michael Liconi-i mezüng online ajanga iba osangji lemsatepa liasü.

Michael-i, "Tongbang rara tiyongtsü nung Tsüngremi mapa inyakdar," ta metetdaksü.

Michael Liconi ya Houston Christian University nung New Testament professor inyaker.

Pai 'The Case for the Resurrection of Jesus' aser 'Paul Meets Muhammad' kaket na densema kaket aika züluogo.

"Ni Palestine nung underground Christian ministries aika ajuruogo," ta pai ashi.

Ministries-i pa dang yamai metetdaksü, "Tesüiba anogo ana tsüngda onoki (ministries) pei chirnur süadoker aliba tebutem aika ajuruogo. Onoki item nisungtem jenokdaksü, onoki parnok mesür, parnok süoshi shidoktsür, Laishiba

Ministries-isa, "Iba sülen sayatenya tulu atalok. Yasüng parnok (Muslim nunger teburtem) 200 dak temi pongmang nung Yisu Khrista angu! Parnoki Tsüngrem O angazüktsü aser Yisu sülen anidaktsü angazüktsü atema onok dangi meyipa aru," ta metetdaksü.

Iba osangtajung atema alima tesem ajaklen Khristantemi pelateptsüla, ta Liconi-i ashi. Michael Liconi-isa, "Iba rara nung ni Israel pusemer, Laishiba nung ajemdaker pusemer masü saka Hamas aser parnok pusemertem ya temenen asüba agi ni Israel pusemer," ta ashi.

Paisa, "Palestine nunger ajakibo Hamas pu-masemer ta ni meteta lir. Hamas pu-mesemra parnok temerenshi angutsü. Iba rara ya tekeraba nung anentsü aser Palestine nunger Hamas talenba nungi salatsü atema Israel-i Hamas samatsütsü asoshi asenoki sarasademdi," ta metetdaksü.

**AO OSHI ANGAZÜKDAK:
TANÜ ANGAZÜKTSÜBA OJANG**



Sempet

(n) nisung kati junga inyaktetba yimya (talent, gift)
* Naga nunger aika dak kententsü sempet lir.

Sempok

(v) tapok adokdaksü, tapok apa (drill o hole)
* Awazürtemi lon bong sempok.

OLONG PAITEP # 6618

	1			2		3		4
5						6		
7		8						
						9		
		10						
11								12
				13				
				14				
15								

TIPLÉN

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latettsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

LANGTSÜNGLEN

- 2. Hai sür inyak - (4)
- 3. Aor tenüng ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

OLONG PAITEP # 6617 TELANGZÜBA

TIPLÉN :

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

LANGTSÜNGLEN :

- 1. Aruli, 3. Balala, 5. Suwar,
- 6. Belem, 9. Sújak, 10. Aonung,
- 11. Dokan, 13. Tinu.

KHEN SHISADANGDI

**ALOKBA AROGOPURI MOLUNG MACHI ASHIBA O KA
ASHITSÜ PASTOR KIDANGI TASÜ ITA AOR.**

Alokba :- Good morning pastorba!
Pastor :- koda Alokba?
Alokba : Pastorba, na tashi maitba kar melenshitsuüsü aru ako yah! Nai angashidar mangashiar, na kibok asemtsü nung nil ah ta ashirah toh yah! Shiranger kidangi ah tejak tepang repranga takar tulur kidangi ang aor tasa asen fellowship puri jembir ako ti,pei San memetetba sannuker menungdaker tasa jembidarko, nu jakdang aliba pastorba tobo kibong shia oa sarasadem agüja, santem den metetpela kanga liasü, saka nabo kenyongi tazü ah to ya!
Pastor : Aya Alokba! Tamalen aliba pastorba tobo kecha degree maliah toh! Saka nibo degree sa degree lirtoh? Aji metetangma. Ni tang kibok suma jajatsü ta nenoki teyimla , nenok kodaki moalier...home evangelist, aser sarasadem committee lir koda, nibo tasüdak, sadidak, aser sentep nung Tsüngrem O anganua agütsüdar ji kü mapa ojang ah toh!
Alokba : oh.... Pastorba, degree abensang, na ama degree abenertem ya, küm pungo (5) inyaksü atakzüka yutsü nungang angatettsü, general meeting nungang ken suoktepedi noh....

- Aienla Ao

Arunachal nung aayanger ana NSCN-KYA telungpuri pur ao
Itanagar, Yimpoksüi/ November 16 (Agencies):
 NSCN-KYA telungpurtem asütsü ta temulung melemi bilemertemi Arunachal Pradesh kübok Longding district nungi ayanger ana purogo.

Aayanger ana ya NSCN-KYA telungpurtem asütsü ta temulung melemi bilemertem yagi Arunachal Pradesh nung Longding district kübok Tisa ayong anasa Kunsu Pongchau lenmang nung amenoker aliba camp ka nungi pua bener ao.
 Aayanger ana ya Brehostibarnü (November 16) anepdang züngia lia iba camp nungi pua bener ao, ta osang ajanga metetdaksü.

Telungpurtemi pur ao asütsü ta temulung melemi bilemer ana ya Shashank Yadav aser Lemgaw Gowam ta jangjaogo.
 Yadav ya Uttar Pradesh nungi lir aser kasa mapang nung Gowam ya Arunachal Pradesh kübok Nginu yimtsüng nung alir ka lir.

MULUNGNEN O



ASO :
30-09-1998

ASÜ :
11-11-2023

Onoki teti meima aliba **TIAMEREN KICHU** iba lima nungi pilar onok tejashi aser mulung zürepa alidang onok den nübu, rongsen aser shisatsü agi yaritepba asoshi ana aser talang nungi kija, lokti tentet, arogo, tembar aser temulunger ajak dang temulung taroktiba nungi pelaba lemsateper.

Onoki item dang alakteta pelaba lemsateper:

1. NSS Club (Dimapur Govt. College).
2. Children School (2013 Batch).
3. Mayangnokcha Higher Secondary School (Commerce -2015-2016 Batch).
4. Dimapur Govt. College Class Mates (2018 - 2021 Batch).
5. Chungtia Baptish Arogo.
6. Aliba Student Union (Mokokchung).
7. Aliba Baptish Arogo (Youth ministry).
8. Rev Talijungla (ABAM).
9. Aliba Union (Longjongkong).
10. Longjongkong Youth ministry.
11. Longjongkong Executive.
12. Longjongkong Baptist Arogo / Arogotsur.
13. Longjongkong Chungtiatsur Telongjem.
14. Aliba Students' Union.
15. Kichuchar Society.

Ozü den yariteper ajak tenüng mezülutetba asoshi kanga sasa bilemer, saka asen Tulusang Tsüngremi nenok moajang ta sarasademtsür.

- Temeim Kinungertem.

Assam:Minister Atul Bora amokmerenba atema lanur ka apu

Guwahati, Yimpoksüi/ November 16 (Agencies):
 Minister Atul Bora tepsettsü amokmerenba atema Assam kübok Sivasagar district nung police-i arishi küm 31 tain lanur ka puogo.

Iba osang ya Assam director general of police (DGP) GP Singh-i metetdakja liasü.

Police temi pua alisang ya Sivasagar district nung Gaurisagar police station kübok Bamun Moran Gaon nung alir Nip Pratim Baruah ta jangjaogo.
 Assam DGP-i ashiba agi, aija alisang anema kuli tejangja bendenba sülen pa ya pua puogo.
 "Sivasagar district nung

Gaurisagar police station kübok Bamun Moran Gaon nung alir Nip Pratim Baruah-i Facebook post ka ajanga Minister amokmerenba atema puogo," ta Assam DGP GP Singh-i ashi.
 "Pa anema kuli tejangja ngutetba sülen puogo."

Temetettsü kaji Facebook ajanga state minister Atul Bora tepsettsü amokmerenba dak sendakba nung Assam police CID-i bushisüngdang tenzüka liasü.

Northeast Now (video) indang Facebook page nung comment ka ajanga Assam minister Atul Bora ya tepsettsü amokmerena liasü.
 Northeast Now (video)

indang Facebook page ka nung Assam minister Atul Bora dak sendakba video package ka nung comment asüba mapang user kati ashiba agi, Assam minister indang official quarter ya poktoktsütsü asoshi tasa ka sadar.

Police temi pua alisang, shibai pa ULFA-Independent züngsem ka ta ashir, pai ashiba agi Assam minister Atul Bora'er quarter bomb agi poktoktsütsü asoshi par teloki tasa asadar.

"Atul Bora'er kidang bomb ka rema toktsütsü atema tasa ka asadar. ULFA nung onoki takokba tashi jenjang agidar. Pa mapang talang kabo malitsü," ta Facebook user yagi ashi.

Sikkim: Indian Army & BRO nati Bailey apu yanglutsüogo

Gangtok, Yimpoksüi/ November 16 (Agencies):
 BRO teyari agia Indian Army Trishakti Corps nungi sepaitemi Sikkim nung Chungthang kübok Teesta ayong temdanga yangluba Bailey apu yanglutsüogo.

Iba apu yangluzükba ajanga North Sikkim nung zümetsüng agi kongshir aliba tesemtem tanga tesemtem den tanaben sendakteptsüogo, koba October 3 aonung nungi shibanger liasü.

Iba apu ajanga gari kecha tetsükdaksü makai senzüdaksüba den tzümetsüng agi kongshir aliba tesemtem relief osettem kecha tetsükdaksü makai bener otsütettsü.

Süklep 200 talang Bailey apu ya tanga apu dang nungi balaka yangluba lir, kechiyong iba ya single span Bailey bridge tarettiba lir.

Iba apu takaratiba nung renemtsütsü asoshi tanen makai

inyakogo. Tetenzük nung BRO-i concrete abutments yanglutsü aser iba sülen Trishakti Sappers-i apu yanglutsü koba anogo pongushi agia liasü.

Iba apu ya Sikkim minister Samdup Lepcha-i, Indian Army, BRO aser civil administration ketdangsurtem matsüngdang lapokja liasü.

Apu yanglutsü atema Trishakti Corps Engineer Troops aser BRO den heavy Earth Moving plants aika amshia liasü.



Assam nung asoba kentener Khanzaadi-i mapang shia linük den Assam indang osangtem prokshir aser tawa television celebrity Abhishek Kumar den sensaksem dang alima nung ayong nung asetkong tulutiba Majuli indang osang lemsatep. Khanzaadi indang tenüng shitakbaji Firoza Khan lir aser la ya Indian rapper, singer aser musician ka lir. India nung 'Bigg Boss Season 17' aser MTV Hustle 2.0 ama sabang tulutibatem nung lai rap songs tenogo.

US aser China na military communications tenzükshitsü pangjem

California, Yimpoksüi/Nov. 16 (Agencies): Tensa tamajungba akumba ajemdaktsütsü mechi US aser China nati mitkar o mitkar tsüingta osangtsüsang agitepba maparen tenzükshitsü pangjem, ta Tir Joe Biden-i ashi.

"Asenok indang-indanga, temolung lapoka aser jangja-jangja osangtsüsang agitepsü," ta pai Bodhbarnü California nung China Tir Xi Jinping den senden amenba sülen ashi.

Küm ka dak tema sülen tang mezüngbuba tena ajurutepa jembishinü aka.

Ajisüaka tang tashi tena tsüingta mangatetep lir amai ajiteter, kechiaser Biden-i Xi ya dictator ama züingshir.

Xi dang dictator ta ajaba China indang foreign ministry-i aitsü, ajisüaka linük anaprongi senden takok ngua agiogo ta ashir.

Tena tsüingta indang-indanga osangtsüsang agitepba

amenoktsü molungtepogo, ta Biden-i ashi. San Francisco anasa senden amenba sülen osangbener den jembidang, osangtsüsang peria magitepba ajanga kodamasü timtem ajuru ta Biden-i ashi aser tangbo tir anaprongi phone agizüka idangjisa indang-indanga jembitettsü, ta ashi.

US House Speaker Nancy Pelosi-i taoba küm Taiwan semdangba sülen China-i mitkar-o-mitkar tsüingta osangtsüsang agitepa aliba rakdang. Beijing-i par sasa yimsü asüba Taiwan ya par litsü ama züingshir aser nüngdakra tashiyim amshia par küboki aitdaktsütsü amokmerena lir.

Mangatetep aika liaka Xi-i indang indanga jembioigo, ta Biden-i ashi.

US business leaders den chiyongba senden ka nung jembidang Xi-i US den tesendaktep tajungba kumnüba

indang rakpoka jembi. Diplomacy aser amalitep lenmang nung maneni jajatsü Tir Biden künati molungtepogo, ta pai ashi.

"Tang lapokba China-US tesendaktep kishi meshibangtsüla. Asenok kati ka tsüingta apu tali atemtsüla aser lenmang tali yanglutsüla," ta pai ashi.

Ajisüaka sapang nungi ayazüka alidang osangbener kati asüngdangba mapang Biden-i Xi ya dictator ka ama züingshir ta langzü.

"Pa ya dictator ka lir, kechiaser pai alima ka madak yimsü asür... aser parnok indang sorkar yimya ya asenok den khenyongi balaka lir," ta pai ashi.

Biden-i iba mesük June ita jembidanga China ketdangsür temi ain adoka telangzüba agütsü aser kanga tim masü jembioigo ta ashi.

(Maneni tapak 8 nung...)

UN Security Council nung Gaza rara anena atatsü pangzüng renem

New York, Yimpoksüi/Nov. 16 (Agencies): Israel-Hamas rara tenzük UN Security Council (UNSC) nung pangzüng mezüngbuba Bodhbarnü renema nüburtim timtem ajurua aliba yaritsü asoshi Gaza nung tekeraba nung 'humanitarian pauses' khanga liasü. Hamas-i Israel amakba aitsüba aser ceasefire tsütsü taoba ita pezüben tashi iba pangzüng meyangluteti arur tang takok ngua yanglu.

Züingsem 15 aliba Security council nung iba pangzüng ya vote 12-0 agi renem, kong United States, United

Kingdom aser Russia linüktem vote magütsü. October 7 nü Hamas-i Israel amakba maitsüba yong US aser UK nati vote magütsü aser Russia-i humanitarian ceasefire akhangba ama meinyakba yong paria vote magütsü.

Iba pangzüng nungya humanitarian pauses asoshi 'akhanger' ta aliba melena 'ayongzüker' ta amshi aser Hamas aser danga telok temi pua aliba hostages ajak tekeraba nung talenba kecha makai chiochtsü shia lir. Iba pangzüng ya Malta-i benoka

liasü. Russia indang UN Ambassador Vassily Nebenzia-i vote magitepdang pangzüng ya agizüktsü merang aser iba mapang züingsem 193 aliba General Assembly ajanga October 27 nü renemba pangzüng amshinü. Iba pangzüng nungya tekeraba nung mapang talangka asoshi humanitarian truce yanglua tsükchitep anentsü shia liasü. Iba pangzüng ya bhukuma linük pongu-i vote agütsü, US-i anema nokdak aser linük toku-i vote magütsü.

(Maneni tapak 8 nung...)

China kitsük-kirong lendong nung nisung 26 asü

Beijing, Yimpoksüi/Nov. 16 (Agencies): Brehostibarnü China north tsütsü Shanxi province nung kitsük-kirong lendong ka ataloka nisung 26 asü aser aika yurua mozüki nung anepalutar, ta osang ajanga ashi.

Luliang yimti nung Yongju coal company meyong storey pezü atongtepa aliba ki nung iba mi lendong ya anepdang 6:50 ako meta tenzük, ta ashir. Nisung 26 asüba jangjaogo.

Iba tesem nungi nisung 63 anizüker ao aser item rongnung 51 mozü kidang lir ta ashi saka mozü kidangi anir aortem asüba osangbo mashi.

Iba mi lendong ya aziökologo aser mi adokba tang tashi bushisüngdangba mapang lir, ta CCTV sangdong ka ajanga ashi. Social media nung video prokshiba nunga iba ki nungi mokozü tanak den milong anüngleni tua jangruba aser nisung aika gari anena ayudak nokdaker repranga liasü.

Video nung sayuba ki ya coal company indang headquarters noksa den kasa lir. Emergency

response personnel tem arrüsanga renemer ki telungi ai.

China Tir Xi Jinping tang United States nung Asia-Pacific lenirtem senden ka nung adentsü oa lir, aser paia iba lendong nung asü-amaba osang angashia kanga jashir ta shia liasü.

Yangji aliba sorkari tongtipang industry tem nung lendong aliba kanga junga bushisüngdang asütsüla aser emergency plans aser lendong nungi kumzüktsü mera tajungba agitsüla, ta pai ashi.

Xi-i akok tashi yirur alirtem yaritsü aser aibelener jangjatettsü ashi. Safety standards junga maliba mesüra ozüing shidak mamshiba ajanga

China nung iba ama industrial lendong ya teti ataloker.

July 11 nüa China northeast tsütsü school gym ka jizüka alua nisung 11 asü. Aji masüdag China northwest tsütsü barbecue restaurant ka nung apokdang nisung 31 asü aser iba sülen ketdangsür temi linük tesem ajungalen mapa inyakdak tesem kumzüka alutsü asoshi campaign tenzüktsü nangzüka liasü.

April ita Beijing nung mozüki ka nung mi adoka nisung 29 asü aser aika kijiba nungi pongzüka liasü. Iba ama lendong tamajungtiba ya 2015 küm Tianjin nung atalok, kong chemical warehouse poksadang nisung 165 shi asü.

Central Pension Accounting Office (CPAO) Department of Expenditure, Ministry of Finance Trikoort-II, Bhikaji Cama Palace, New Delhi - 110066

Pension Adalat koba Shillong nung 20.11.2023 nü physical mode nung ayongzüktsü liasü, iba sentong ya administrative tsütsü meimlai aliba kodamasü kar ajanga thinentsüsa akumer. Ajisüaka osangkaket nung tamalen adoka aliba virtual mode nungbo alitsü.

CBC 15111/11/0004/2324

Chief Controller (Pensions)

Pelaba Metetdaksür



Mrs. Noksangyula (Aliba) 23 September 1939 - 8 November 2023

Ozü tsürabur shiranga alidang aser akümüli tempangdang Arogo, lokti, aser adianutem kwikati sarasadem nungi tenzük nübü, rongsen, aser shisatsü agi yaritepogo, nenok ajak dang kangasa pelaba metetdaksür. Nenok teyari ajanga maparen ajak kanga junga renemtsüogo, asen Teyanglur Tsüngremi nenok ajak moajangma.

- Chirnur, Semchirtem, aser Kinungertem.

SÜR KÜM KA AJUNGER



Onoki teti meima aliba Lowaba Pongen 18.11.2022 - 18.11.2023

Nai onok yutsür küm ka jungaka anogo kata na onok mulungjang nungi metokor. Nü temeim aser aria bilem onok mulungjang nung teti alitsü. Asenok tanaben majurutep tashi na kotak nung jangratema alitsü sarasademtsür. Onoki na kanga menungrar. Kotak nung tesunep nung anisüngzükang!

Temeim Oja, Oya & Kinungertem

Pelaba Lemsateper



ASÜ 10-11-23

Onoki teti meima aliba Asür TOSHINOK shiranga alidang aser ajungbena asüba mapang onok molung süngzükja sarasadem, nübü aser rongsen agi nungita yariba kija-kibong aser lokti tentet balala dang asür kinunger temi pelaba lemsateper. Tsüngremi nenok ajak moajang.

Onoki tsünglanglen shia alirtem dak alakteta pelaba lemsateper:

1. Dr. Tali Longkumer, MD, DM, City Medical Centre, Dimapur.
2. Dr. Daili Athkho, MD Zion Hospital Dimapur.
3. Dr. Tatonginla Jamir, MD (Medicine), Faith Hospital, Dimapur.
4. Miss Limasangla Walling & Mr. Lagan Sethi of VMMC & Safdarjung Hospital, New Delhi.
5. Doctors & Staffs of VMMC & Safdarjung Hospital, New Delhi.
6. Ao Baptist Arogo, New Delhi.
7. Ao Senso Telongjem, New Delhi.
8. Commandant & All Ranks & Files of NAP Stationed at New Delhi.
9. Airport Authority of India, Dimapur.
10. Kidanger, Tembar aser Kinungertem.
11. Longkumer (Akhori) Telongjem, Changki.
12. Dimapur Changki Senso Telongjem.
13. Dimapur Changki Fellowship.

- Asür Toshinok kinungertem.

4buba Autumn Huddle takok ngua asayaogo

Dimapur, Yimpoksüi/ November 16 (TYO): Ao Kaketshir Telongjem Dimapur-i ayongzükba official saisapong aser Athletics tetoktepa; 4buba Autumn Huddle November 15 aser 16 nü Government Higher Secondary School ground, Nagarjan nung kanga takok ngua asayaogo.

Asayamung nung Aoer yimtsüng ajak nungi kaketshirtem lokti tentettem aser Ao Kaketshir Telongjem Dimapur nung züngoksema aliba sub-unit ajak telok ti tashi küma lemsar asaya balala asaya liasü.

Asayamung nung shilem agiba team temji:

- Sungkong Bangers (Chuchuyimlang, Soyim, Lirmen, Kupza, Chungtiayimsen, Aoyim)
- Arju Dwellers (Mangmetong, Akhoya, Molungyimsen, Mongchen, Chungliyimsen, Japu, Diphupar)
- Tenum Flyers (Mopungchuket, Khensa, Yaongyimsen, Yimjenkimong, Lakhuni, Padampukhuri)
- Tzula Warriors (Mongsenyimti), Chungtia, Asangma, Longkhum, Longkong, Anaki, Unity village)
- Meinkong Woodlands (Süngratsü, Longmisa, Dibua, Changdang, Kelingmen, Chami, Changki, Naga Un)
- Milak Rapids (Longjang, Merangkong, Aliba, Unger, Mokochung yim, Aonokpu, Diphupar B)
- Tzurang Giants (Changtongya, Warumong, Chuchuyimpang, Moayimti, Longpa, Nokpu, Aoyimti)

Menung Tigers (Khar, Kangtsung, Longsa, Molungkimong, Mekuli, Longjemdang, Aoyimkum) liasü.

Asaya balala nung takok angurtem:

- 100m; tebur**
 1. Tarep Imsong (Milak Rapids)
 2. Imlikokba (Tzurang Giants)
 3. Imlisunep (Menung Tigers)
- 100m; tetsür**
 1. Imchasenla (Arju Dwellers)
 2. Lanumongla (Tenum Flyers)
 3. Talikala (Arju Dwellers)
- 4x100m relay; tebur**
 1. Milak Rapids
 2. Tzurang Giants
 3. Temen Flyers
- 4x100m relay; tetsür**
 1. Arju Dwellers
 2. Tzurang Giants
 3. Milak Rapids
- Shot put; tebur**
 1. Imsuren Longchar (Tenum Flyers)
 2. Imkongsunep (Tzurang Giants)
 3. Temsu (Arju Dwellers)
- Shot put; tetsür**
 1. Merensangla (Menung Tigers)
 2. Imlinaro (Arju Dwellers)
 3. Lanukala (Tzurang Giants)
- Javelin; tebur**
 1. Yimlitangnok (Tzurang Giants)
 2. Bendanglemba (Milak Rapids)
 3. Takowati (Menung Tigers)

Javelin; tetsür

1. Kika Lkr (Milak Rapids)
2. Moamenla (Menung Tigers)
3. Lanukala (Tzurang Giants)

Tug of war; tebur

1. Tenum Flyers
2. Tzurang Giants

Tug of war; tetsür

1. Meinkong Woodlands
2. Menung Tigers

Volleyball; tebur

1. Tzurang Giants
1. Tzula Warriors

Volleyball; tetsür

1. Sungkong Bangers
2. Milak Rabids

Football; tebur

1. Sungkong Bangers
2. Meinkong Woodlands.

Iba asayamung nung Tzurang Giants puri ajak senteper point 180 ngua parnok overall champions liasü. Parnok sülen tanabuba jenjang nung Milak Rapids (140 points) aser tasembuba jenjang nung Arju Dwellers (100 points) liasü.

Brehostibarnü asayamung shibangba sentong ya AKTD Sanen luden züngsem Bendangwala lenistüba nung agi aser Mission Director DABA, Jungshimanen-i sarasademer tenzüka liasü. Sentong nungsa DNSU tir Maongyanger-i tayongzükba o jembi aser organizing committee convenor Ricky Ozukum-i tepela o jembia liasü. Sentong nungsa sempet agütsüba sentong ya AKTD Tongti Zülur Hangi Jamir-i achaayanga agi aser Sanen Luden züngsem Achen Imchen-i sarasademer sentong tembanga liasü.

NSOAC November 16 nü tenzükogo

Dimapur, Yimpoksüi/ November 16 (TYO): Nagaland Senior Open Athletics Championship 2023, November 16 nü Indira Gandhi Stadium, Kohima nung tenzükogo. Iba asayamung ya Nagaland Athletics-i ayongzükba asayadar. Nagaland Senior Open Athletic Championship 2023 anogo ana asayaba mapang ajak senteper asaya 26 asayatsü; tebur 13 aser tetsür 13.

Asayamung nung asayatsü aliba asayatem yamai alitsü:

1. 100M, 2. 200M, 3. 400M, 4. 800M, 5. 1500M, 6. 5000M, 7. 10000M, 8. Long Jump, 9. Triple Jump, 10. High Jump, 11. Shot put (tebur 7.260kg aser tetsür 4.000kg), 12. Discus Throw (tebur 2.000kg aser tetsür 1.000kg), 13. Javelin Throw (tebur 800 gm aser tetsür 600 gm).

[7:07 pm, 16/11/2023] Nukshi TYO-App: Arsene Wenger-i Bhubaneswar nung AIFF-FIFA Academy lapoktsütsü

Yimpoksüi/November 16, 2023 (Agencies): Nüngtugu football coach Arsene Wenger-i UEFA talent development scheme kübok Bhubaneswar nung November 21 nü AIFF-FIFA academy lapoktsütsü.

Wenger shiba FIFA indang global football development programme tekolakba lir pai November 18 nungi 23 tashi India semdangts aser ISL, I-League club tem den ajurutepeba den Indian football nung youth development nung sendaka alirtem den ajuruteptsü.

Wenger ya 1996 nungi 2018 tashi Arsenal indang manager liasü aser pa lenisüba nung club-i Premier League titles asem, FA Cups tenet aser pa lenisüba nungsa club asaya 49 tashi khen danga tamakok mongui asaya liasü.

Iba dak sendakba nung Odisha CM Naveen Patnaik-i, "linük nung lanur asayartem anitettsü atema India nung mezüngbuba #AIFF-FIFA Talent Academy amenoktsü

asoshi FIFA-i #Bhubaneswar shimba pelashishia sangdonger. Iba asaya terenlok asoshi takokba tashi teyari agütsütsü #Odisha Govt bendanga agütsür lir aser linük nung football asayartem atema facilities tajungtibatem yanglutsütsü asoshi @IndianFootball den kanga junga sendaktepa inyaksangshidar," ta ashi.

FIFA indang talent development scheme nükjidongji alima ajunga nung member associations den longjemer inyaka item linüktem national team jenjang tajungba kümdaktsütsü asoshi lir.

"Arsene Wenger-i November 19 nungi 23 tashi India semdangtsü. India semdangba mapang pa aser par team-i ISL, I-League club tem aser Indian football nung lanurtem terenlok asoshi inyakertem den ajuruteptsü," ta AIFF tir Kalyan Chaubey-i Bodhbarnü sangdong ka ajanga metetdaktsü.

"Onok nükjidongji iba academy ya kanga junga yangertsü asoshi lir. Wenger tajangshibatem aser tangatetba ajanga iba academy ya world-class facility ka kümdaktsütsü asoshi teyari agütsütsü ta onoki tamang akar," ta paisa ashi.

AIFF acting secretary general M. Satyanarayan-i ashiba agi, iba ya All India Football Federation's (AIFF)-i küm aika nung ajanteta aotsü asoshi nükjidong ayuba aser arishi küm 14 tekübok alir tanur asayartem dak rangloker inyaktü asoshi sentong yanglur aliba nung shilem ka lir.

FIFA-i, FIFA-trained coach asütsü Sergi Amezcua Fontrodona recommend süogo, shiba iba project benoka inyaktü atema India-i arutsü aser FIFA-AIFF academy head coach ama inyaksangshitsü.

Amezcua ya taoba mapang China nung football terenlok asoshi inyaksangshiba nung Barca Academy Pro Haikou nung project director liasü.

US aser China na military communications...

(Tapak 7 nungi...)

Biden-i jembiba ya China indang foreign ministry-i Brehostibarnü aitsü aser Xi ya dictator ka ama ta ashiba ya kanga tai aser junga meshisadangi yimtenren tsütsü nüburtem anisaba lir ta ashi.

Lenir ana tsüngta senden junga amenba nung ibai o tako ka liasü. Military communications tenzükshitsü den ano linük anaprongi tawa tensa mejungi akumba tesemtem nunga lenmang bushitsü pangjemtepa liasü.

Item rongnung US-i fentanyl aitba azüoktsü asoshi mera

agitsü indang lir, koba ajanga linük nung iba mozü tali agir asüba timba akumer.

Chinese manufacturing company temi iba synthetic opioid yangluba kisüng masü saka iba mozü yangludang amshiba chemical tema yanglur. "China nungi Western Hemisphere leni 'precursor chemicals' aitba ajemdaktsütsü asoshi asenoki mera agitsü," ta Biden-i ashi.

Iba tezüngzüktepa kübok China-i precursor chemicals yangluba company tem shibangtsütsü. "Iba yagi nisung

takum kumzüktsü," ta Biden-i osangbener dang ashi.

Tenati Israel aser Gaza nung raraba indanga jembia liasü. Biden-i China dang par tashi amshia Iran dang iba rara nung shilem magidaktsütsü ashi, ta US ketdangtsür kati osangbener dang ashi.

Linük ana yagi lungjemer artificial intelligence (AI) asadangtsü molungtep aser Taiwan indang talangka jembi, koba US-China tesendaktep nung ken o tamajungtiba aser tulutiba lir ta Xi-i ashi, ta US ketdangtsür kati ashi.

UN Security Council nung Gaza rara...

(Tapak 7 nungi...)

Security Council ajanga mezüngyongi ceasefire asoshi pangzüng renemer alitsüla liasü, ta Riyad Mansour, Permanent Observer of the observer State of Palestine ajanga ashi.

Israel indang UN ambassador Gilad Erdan-i sangdong ka nung, iba pangzüng ya asangsang den tesendaktep maka aser tetetzü mali, ta ashi.

Council ajanga Hamas maitsüba asoshi pai UNSC aitsü aser telungpur temi asaa tensa tamajungba kümdaktsür aser ibaji ajanga United Nations-i Israel dang Gaza nungi ainshitsü ajungshidaktsütsü meranger, ta ashi.

"Yamaji mataloktsü. Hamas mesamatsü tashi aser pua alirtem kidangi meyipa meshilang tashi Israel-i

inyaktü," ta Erdan-i ashi.

Iba pangzüng benokba asoshi US Ambassador Linda Thomas-Greenfield-i Malta aser danga Council züngsemtem dang pelaba ashi saka Hamas maitsüba mesüra kiralongrari amakba mapang Member States ajaki pei nüburtem kumzükba ayutsü temeden makangshiba yong vote magütsür, ta ashi.

CRPF-i asayadang amshiba osettem agütsü

Dimapur, Yimpoksüi/ November 16 (TYO): School tanurtem saisapong nung shilem agitsü atema ajungmesotsü nükjidong nung 78 Bn, CRPF, Zubza-i, Don Bosco School Zubza nem asaya dang amshiba osütsüt balala tenla agütsüogo.

CRPF-i, Table Tennis board den tennis bat & balls, Volley Ball, Volley ball net, Basket ball, Badminton Racket aser

Shuttle Cock amala oset balala agüja liasü.

Asayadang amshiba osettem ya November 16 nü Civic Action Programme ka ayongzükba agiba mapang Don Bosco School, Zubza School Management nem agüja liasü.

Iba sentong nung 78 Bn, CRPF Officer aser sepaitem, Don Bosco School, Zubza nungi school staff aser kaketshirtemi shilem agia liasü.

BILEMDANGANG

"Ochi agi tamang yangerteter."